

آه . . يا وطن

شعر
منى عوض

تقديم د. يسرى العزب

مطبوعات الفجر
تصدر عن جماعة الفجر الأدبية

المشرف على التحرير **دكتور يسرى العزب**

١١ ش محمد منصور - أرض اللواء (فيصل) الجيزة
تليفاكس ٥٧٠٢٢٤٢

الغلاف والرسوم الداخلية
للفنانة / **منى عوض**

رقم الايداع : ٣٦٥٠

زرد مصر للطباعة والكمبيوتر

إهداء

إلى القلب الطيب .. النبيل

إلى الإنسان ..

إلى .. الزمان .. والمكان ..

الذي يحتوى .. هذا القلب

.. وهذا الإنسان

أهدي هذا الديوان

مهندسة / مني عوض

٢٠٠٣/١١/١

المحتوي

٧	* تقديم بقلم دكتور يسرى العزب	
١٣	١ موسم الري	
١٧	٢ الحب	
٢٣	٣ حروف القصيدة	
٢٩	٤ لما أقول لك	
٣٣	٥ أنا ببيك	
٣٧	٦ أرجوك	
٤٣	٧ أنا مش هافتح	
٤٥	٨ القلوب الطيبة	
٤٩	٩ زعلانة أنا	
٥٣	١٠ لو كان	
٥٥	١١ قلبي يا	
٥٩	١٢ حفنة بعاد	
٦١	١٣ العولمة	
٦٥	١٤ يا زين	
٦٩	١٥ آه .. يا وطن	
٧٣	١٦ أحزان	

٧٧	مش بس	١٧
٨١	مناجاة	١٨
٨٧	الله يا بلدنا	١٩
٩٣	كان قلبي	٢٠
٩٩	وطني	٢١
١٠٣	طاقة حب	٢٢
١٠٧	ده حظي	٢٣
١٠٩	مالي الدار	٢٤
١١٣	القلب اللي	٢٥
١١٥	مهدودة أنا	٢٦
١١٩	انت منور	٢٧

الوطن / الحب

قراءة في ديوان (آه .. يا وطن)
بقلم الدكتور يسرى العزب

- ١ -

مبنى عوض مهندسة مرموقة في الهيئة المصرية العامة للبتروول .. حصلت على بكالوريوس هندسة القاهرة وعددد من دبلومات الدراسات العليا بعد ذلك .. ومع نجاحها في تخصصها العلمي والعمل، فإنها تمتلك موهبة فنية تتجهر في مجالات الفن المختلفة أهمها إجادتها الرسم (الفن التشكيلي) بدرجة شهد بها المتخصصون في هذا المجال، وتستعد لإقامة معرضها الفني الأول بعد شهور قليلة، وثانيها إجادتها التعبير شعرا عن ذاها وعن تجاربها الحياتية بالعامية المصرية إلى الدرجة التي جعلتنا في جماعة الفجر الأدبية وفي جمعية الأدباء، نلتفت إلى موهبتها ونقدمها في ندواتنا لتنشد قصائدها الجميلة، جاذبة إليها الأسماع والأفئدة، مما جعلت الكثيرين من زملائها الأدباء يطالبون بنشر ديوانها الأول فلا تملك جماعة الفجر إلا أن تستجيب لهذه الرغبة فتبادر بطبع هذا الديوان (آه .. يا وطن) ضمن (مطبوعات الفجر) فرحة بهذه الموهبة مشجعة

لها ومبشرة بها، واحدة من أفضل شاعرات العامية المصرية إبداعاً وخلقاً.

- ٢ -

وتتصبع من قصائد الديوان نزعتان، هما الحب والخوف على الحبيب، وهما معاً يمثلان في متن هذا الديوان الجديد، رؤية محببة للحياة في الوطن، الذي ترى فيه الشاعرة زادها وكنزها اللذين يعينها على مواجهة كل مشكلاتهما النفسية والاجتماعية، وفي هذه الرؤية درجة عالية من الطموح إلى تحقيق النموذج المثالي للوطن/ الحبيب فهي تتشوق إلى وطن / حبيب نظيف وطاهر خال من التشوه والفساد والخديعة والخيانة والغش.. وطن جديد خال مما يعترى الواقع الإنساني المعاصر الذي تراه على حد قولها :
أحزان، ورا أحزان، ورا أحزان .
وقلب مهان ..

- ٣ -

إنما تسعى حثيثاً إلى وطن جديد / حبيب جديد هو (موسم الري الذي تفتتح لمقدمه مشاعرها على هذا النحو :
دي مشاعر قلبي لما تفيض
بتروي بحبي كل الغيط
ولا تعرف موسم أو مواعيد

غير إنك تيجي وتملا البيت
قوم .. يضرح كده على طول قلبي
يملا لي الدنيا زهور وورود
وخمايل من أوراق التوت

هي إذن (جنة) يقيمها وطن جديد وبشر جدد تقف
الشاعرة بينهم حاملة (راية الحب) الذي هو دم الحياة ونبضها، الذي
يمنح هذه (الجنة) المزيد من القدرة على البقاء والاستمرار . هي
الوجه الآخر للفارس الذي يؤدي واجبه الوطني متفانيًا حتى يتحرك
الواقع لتحقيق هذا الهدف المنشود :

يا فارس مليان حنية
والكلمة بقلمك مروية
بمداد أرواح حلوة عفيفة
ورافعها سلاح لسنين جاية
بتقول بالدم هنفديكي
وحياتنا بنهديها ليكي
الله يا بلدنا عليكي

- ٤ -

إن الواقع المثالي الذي تسهم الشاعرة المهندسة في صنعه ليس تخيلاً أو
تصوراً وهمياً، وإنما هو واقع حقيقي يمكن الوصول إليه بالحب
الحقيقي الذي يدفع بأصحابه إلى بذل كل ما يملكون من وسائل

لتأكيده، بل لإعادة غرسه من جديد في الأرض، فهذا الوطن هو
الحب الذي تفتقده حياتنا ونحتاجه وتطلبه وتسعى إليه حتى يجيء
فهو لازم للحياة لزوم الماء والهواء. وهو الدافع الأساسي للانتماء.
تقول الشاعرة في قصيدة (كان قلبي) :

باحثاج لك تيجي تدويني
من أول ما تفارق عيني
بتغيب الدنيا ولا تجيني
ولا تيجي إلا بلكاك

- ٥ -

وتعد الشاعرة القلم / الشعر من أهم أسلحة الكفاح التي يجب أن
يوظفها المبدعون في معركتهم لتغيير الواقع إلى الأفضل، وعلى
المبدعين أن يمتلكوا كل طاقات التحمل بالصبر والجلد وتقوية الحب
والإمسك بجذوته حرصا على تحقيق الهدف، ولكنها تناشد الحبيب
- في نفس اللحظة - أن يعاملها بالمثل وإذا بدا على وجهها أثر
الغضب فما هذا الغضب إلا شكل ظاهري مؤقت لا يلبث -
بالغفران - أن يعود إلى رضا :

إوعي تصدق
لما أقول لك تبعد
إني باقولها صحيح
انا مش ممكن عنك أبعد

د أنا من غيرك بابقى جريح

- ٦ -

ولكن مواطني هذا الوطن / الحبيب يعيشون رغم كل ما يحدث
بجبه. متمين، أصحاء أقوياء، تقول الشاعرة في قصيدتها (أنا بيبك) :

أنا بيبك راح اصالح أيامي
واملاها ورود وزهور وكلام
ومعاك راح أرسم أحلامي
وأطير وياك.. وما أقولشي سلام
ولا أسأل إلا عليك إنت
ولا احسشي إلا بيبك إنت

- ٧ -

وفي حديقة مني عوض الشعرية تكثر الزهور والأشجار
والألوان والجواهر وكل مفردات المعجم الرومانسي الجميل، لتواجه
بها كل مفردات الأسى والحزن والشجن والرعب والفرع والدمار
والإحباط وكل مفردات المعجم الرومانسي البشعة، وهو ما نجده في
قصيدة (القلب اللي) التي تكتبها بطريقة التدوير :

"القلب اللي كان كسير، ملمم جراحه ف براحه، وقفيل
بجزنه على محاسنه وانتوي يرجع يطير، بعيد عن سكة
الأحزان، وحيد متدني بالأشجان، يمكن يعيش بالآلام ما

فيش، يمكن يداوي بالغياب غدر الصحاب، يمكن كده
يرجع له غصنه وهو ماشي ف سكتة مع دمعته مع غنوته
بعد الإياب... ومشي وشالك جوه نبضه، ما انت عهده
ودنيته ونعيم هواه... لو خاف بتاخده توّسه، ترفع جبينه
تحرسه وتعيش لقاءه.. ولا عاد بيقدّر بيتعد، ولا يرتعد، ولا
ينكسر مهما حصل وانت ضياه.."

سنرى هنا أن مفردات المعجم الرومانسي الكابوسية
والمأساوية توجد تقريبا بنفس درجة وجود مفردات المعجم المتفائلة
والمشرقة التي تتغلب - كميا وكيفيا - في نهاية القصيدة. مما يؤكد
أننا بالفعل مع شاعرة جديدة ترى العالم بعيون يقظة وتسعى إلى
تغييره - بالفن وبالعلم معاً - إلى الأجل والأبدي.
وأتمنى لها مزيدا من التوفيق ..

د. يسرى العزب

٢٠٠٣/١٢/٥


موسم الري

دي مشاعر قلبي لما تفيض
بتروي بحبي كل الغيط
ولا تعرف موسم أو مواعيد
غير إنك تيجي وتملا البيت
قوم.. يطرح كده علي طول قلبي
يملا لي الدنيا زهور وورود
وخمائل من أوراق الثوت
أركن جواها وأخبي
وكأني لسه يا دوب مولود
بردان


عريان


محتاج لحنان

أحضان حبي



محتاج لك تيجي ما لكش حدود
واتصلل بيبك وتعيش جنبي
ما هو أصلك إنت صاحب الأرض
تمشيها بطول
تمشيها بعرض
راح تيجي لأرضي وترويني
ها تغطي بيبك وتدفيني
من خوفي .. إنت هتحميني
ما هو إنت هواي وأحلامي
عاش جواي ف أيامي
ووجودي معاك
دا نعيم مسحور
بيخلي لقاك
ده ماسات وبحور






ويفيض ويزيد
ومشاعر كده.. عمالة نفيس
وتزيد بلفاك
وتزيد
وتزيد




الحب

الحب هو النور بيملا الكون بالبلور
في أي ناحية راح هتطوف
ما تشوف
غير زمن بيدور
بصوت مسحور
لطيف أبيض
بقى راضي
ما يعرف خوف
تشوف نفسك بقيت زيه ..
بتتهادى وتنمايل ..
وصورتك ويا صورته
ع البلور
بتتخايل

تشوف روحك مع روحه
سوا طائرين
بصحبة ورد
ويا زهور
في خمائل
تشوف قلبك مع قلبي
نسي جرحه
هوى اتنين
يشق الصخر
بجداول
تتام الليل على صوته
وتملا بالصييل بيته
حصان عربي
عليه فارس



ومتلثم
ورافع سيف
وقلب نصيف
بيتكلم
ويدي حنان
يفيض في مكان
ما لوش آخر
وتفضل بالحبيب مشغول
وتتمنى الليالي تطول
عشان تسهر تملي معاه
وتنده له عشان تلقاه
يجابك إن ده المكتوب
وإنه جاي وقت غروب
عشان يفضل



كده

آخر

ويفضل فيك

من الآخر

ويفضل ع الجبين النور

تعدي من سكك وبحور

ده صاحب بيت وبيك بيدور

تطوف به ليه في أخلامك

تشق بسيفه أيامك


ويملاها الليالي شوق

ويرسمها لقا من ضي

يطير بالروح يغرد فوق

ويبقى الحال ما عاد له زي

وعاد الليل بيتتفس




شجر بيميل ويتونس
ويرجع لك ثاني الإحساس
بأنه.. هو.. كل الناس







حروف القصيدة

حروف القصيدة
حروف مش عادية
مدادها .. قلوبنا ..
سنيننا اللي جاية ..
وأوجاع شديدة ..
وأحزان فريدة
بترمي .. تصينا ..
عشان ده نصيينا ..
نعيش كل مرة
نموت كل مرة
ونصحى .. ونكتب
حروف القصيدة ..
نموت كل مرة





بتقطع حشاي
وترمي شظايا
قريبة .. بعيدة ..
تفتت بقايا ...
وتسبح في هم
تقطعنا جوه .. في وقت الميلاد
ونفضل في هوة .. كاتبها المداد
كلام من قلوبنا
سهام من جيوننا ..
ذهب من جراحنا
وماس من فرحنا
تسيننا .. وإحنا
بنزرع صباحنا
وفارشين براحنا



وطايرين بروحنا

ما نشعر بغم

حروف القصيدة

.....

دي صبحت جديدة

وحنيت في يوم

ولبست .. هدوم

وراحت تقابل .. أمير الكلام..

ووشمت خدودها .. ورسمت حدودها


وقالت نصيبي .. ومكتوب أقوم

وأبقي سعيدة

ولا أفضل شريفة

دي دنيا ورودها .. وجاية بوعودها

وكل الحبيب بوادي الغرام



وطارت ما رجعت .. وفضلت تطير

فراشة بتعند ويا الأثير

ماعادش .. بتخرج .. ووياها دم

ولا يوم بتسبح ومليانة هم

ورجعت بسيطة

طرية .. وسعيدة

حروف القصيدة


حروف القصيدة






لما أقول لك

لما أقول لك ابعد .. قرب
واعرف إن كلامي .. كلام ..
لما تبعد .. أنا بالتغرب ..
باشعر إنني من الأيتام ..
أسمع صوتك .. يطمئني ..
ينعش قلبي .. بالأحلام
حلمي معاك .. دائما ييسرني
يجعل قلبي .. نعيم وسلام ..
وأبقي عايزة أقول لك .. قرب
ألقي نفسي بأقول لك .. ابعد ..
وأه لا البعد .. بجيب الصدا
ويملا فكري بالأوهام ..
واخاف تسمع لي .. وتبعد عني






لما أقول لك تبعد
إني باقولها صحيح
أنا مش ممكن عنك أبعد
دا انا من غيرك باقى جريح
قلبي معاك .. بقى هو الأسعد
يفضل كده واضح .. وصريح
أصل انا لما بأقول لك .. تبعد
بابقى عارفة إنك سيد
جاي قوام .. فارس مقدم
جاي كأنك عصف الريح
جاي عشان راح أقول لك قرب
إوعي تشرق .. إوعي تغرب
لما أقول لك .. أبعد، قرب
واعرف إن كلامي كلام


.....



أنا بيك

أنا بيك راح أصالح أيامي ..
وأملأها ورود وزهور وكلام ..
ومعاك راح أرسم أحلامي
وأطير وياك .. وما أقولش سلام
ولا أسأل .. إلا عليك إنت
ولا أحسش .. إلا بيك إنت
ما هو قلبي .. خلاص ما بقاش قلبي
راح مني .. وعندك متخبي
ولا عايش يرد عليّ سؤالي
ولا راضي يريح لي بالي
ولا عايز يرجع لي ثاني
ولا عدتتش أنا عارفة مكاني
ولا إمتى ها رجع لزمانى ..





أرجوك

أرجوك ..

خد بالك من أرضي

دي عمري

وقصوري

وعرضي

ومباديء ربوني عليها

من صغري وحياتي ليها

وكبرت ولست باغنيها


ولا يوم راح أنسى

- في ده -

فرضي

جواي .. فلاحه خجلانة

روحها بالخير كده شبعانة



تمشي وکمان تتخطر

وبرقة قلبها تتعطر

وتحب الناس

وتدوب إحساس

وتحس بأنها

- مش أكثر -

من طيف بالنور

كده متحرر

ويطير لسحاب


من نهر حنان

ويعيش في هضاب

كلها أغصان

مش عايز منك

غير تراعيه



تاخذہ جواک

ما تدوشش علیہ

تسعدہ بلقاک

وما تلعب بیه

أحسن یتحطم .. یتکسر ..

ویقع

ما یعود

ع الطیر

یقدر


ولا یقدر - حتی -

یقول : أرجوک

ولا یعرف - حتی -

یقول : أرضی

ما هو أصله ان ضاع







أنا .. مش ها فتح

أنا مش ها فتح ثاني الباب
ولا راح أعتب ع الأحباب
أصل القلب ده لما بيدّي
أرجع شايّل جرحه بيدّي
يلقى الورد وشوكه كتير
يدمي الإيد من غير تفكير .
ولون الدمّ بلون الورد
كل ما يقطع وصل وعهد
أو يستنى لحب كبير
أنا مش ها بكى على اللى راح
ولا راح أشكي واعد جراح
أصل جراحي بقت أصحابي

القلوب الطيبة

دي القلوب الطيبة
زي دمة قريية
عمرها دايم قصير
الفرح جرح يهزها
والحزن أصله عشها
وصدرها بينام كسير
لا الغدر يبق في ف طبعها
أو خير يردده منعها
بتفيض كما المطر الغزير
وبتروي في الأرض العطش
وتشق في الصحرا الطريق
تسقي الجداول والخمايل






ولا عدنا نملك غير كلام
حتى الحروف راحت هنا
احنا وأنتم .. كلنا ...
ما هو كلنا
في الهم
زي الغم
زي الدم
زي الصم
نسمع نفسنا
ونعزي فينا نفسنا
ونعري فينا نفسنا

.....




زعلانة أنا

أنا زعلانة قوي من نفسي
ماشية ف سكة .. دايمًا تمشي ..
وتاخذ قلبي معاها .. بعيد ..
لا أعرف إمتي؟ وفين راح ترسي؟
يعني يا قلبي الاقيها منين؟
منك .. والا .. من اللاليمين؟
واخذ نفسي .. ورايح فين؟ ..
عنده .. تصبح .. والا تمسي ..
وايه .. راح تاخذ .. لما بتدي ..
ناوي نتاخذ .. طب ما تهدي ..
خليك ساكت .. واوعي تعدي ..
أصل الحب ده بحر يودي ..
هتموت منه قبل ما تمضي ..
لا ينفع اجيب لك تاني طبيب ..



ولا في زمني هالقي حبيب ..
يفضل جنبك .. يبقني قريب ..
يرجع نبضك .. لما يغيب ..
ويبقى معاك .. مكتوب ونصيب ..
قلبي يا واخذ على الحنية
يا اللي بتتسي كل أسية
يا للي بترجع تمشي السكة
وأنت ببتبض دقة بدقة
دقة حب تلاقني حبيبك ..
ودقة تدب بنار هتصيبك ..
وانت حاسبها ودقت لهيها ..
لا بتسيها ولا بتسيك ..
ها تروح ليها .. وهي تجيبك ..
هتدوب فيها .. وتفضل ليها ..



مالي رمانه بماسات حبي ..
وخدها وراح يستتي لقاه ..
ونفسي وعدها .. تعيش بضياه ..
لا فكر في .. ازاى راح اعيش ..
وانا من غيرهم .. ما بامشيئش ..
من غير خيرهم .. دنيا ما فيش
وانا مش عارفة .. ازعل من مين
قلبي راح .. بقي عند الغالي ..
نفسي براح .. باستتى ليالي ..
وهو سايبني وحدي لحالي ..
وواخد عنده نفسي وقلبي ..
وأنا زعلانة قوي من قلبي ..
راح لحبيبي مع نار حبي ..

.....

لو كان

لو كان الحب .. هو القلب ..
لما يستتي .. يشوفك
أو تجي له
مغسول بمية تلج بارد في الشتا
ومغطيه بخوفك في الفضا
مش قادر تشيله
حاسس بأنه خميلة
تتفتح زهورها الجميلة
جوه بحورك الساكنة بجوفك
تكش بقلبك .. ينتفض
تلاقيه بعيد .. واقف هناك
بيص لك .. نظرة طويلة
تحس بيها .. تحضنك



وتعيش معاك ..
وتحس إنه ليك قبيلة ..
ومنورة بتزيد بهاك ..
لو كان ده قلبك ..
اللي مستني يشوفه
أو يجي لك
رامي خوفه
يبقي حبه .. جوه نبضك
زي طيفه
لما يحضنك .. ويعيش معاك

.....

قلبي يا ...

قلبي يا ... صفر .. يا صاحي
لسه ها تطير في السحاب ..
لسه هتغرد صباحي
لسه هتشق الضباب
لسه هتعيش فرح بكرة ...
.. وانت ماشي للإياب ..

.....

ليه ما تتعلم تموت ..
جوه حزنك لا تقوت
تملأ الأيام .. خفوت ..
تعرف إن السكة .. غاب ..

.....

ليه بنفرح .. زي عيل ..

مش بيّفهم حاجة .. أهبل ..
لو قالوا له يااله إنزل
بيجي ناطط م السحاب ..


.....

قلبي .. ليه بتدوب قوام ..
كل ماتصيبك سهام؟
ده انت عارف قد إيه
الآلم طعم الحطام

.....

ليه بتتمرد يا قلبي ..
ليه بتخبط جوه جنبي ..
فاكر ان الحب دنيا
لما تيجي مرة ثانية
راح تغني .. والا يعني ..

راح تلاقي لقمة حانية
وانت طائر في الهضاب
قلبي.. يا عصفور .. مثالي
ده انت عارف ايه جري لي
هس .. واركن جوه عيني ...
قبل ما يرجع أنيني ..
وافتكرك ..أحلي منام ..



او عي دايما من حبيبك ..
تتجرح ويكون نصيبك ..
ذكريات تدمي فياك ..
أو آهات .. وتكون دي زادك ..
امش .. ودع .. قل سلام ..
امش .. ودع .. قل سلام ..

.....



حفنة بعاد

لون المطر
زي القدر
زي السهر
ما لوش ميعاد
ينزل على كل البلاد ..
يهطل .. ويجري له الولاد ..
واهي دنيا .. ماشية بالعباد ..
وأهو كله .. رايح سكتة ..
مكتوب .. يغني غنوته ..
فيها الفرحة .. فيها الشجن
محسوب ثواني بهدمته ..
مهما لبس .. مهما خلع
عريان .. ومتغطي بودع

سهران .. ومستحلي الرقاد ..
بردان .. ومتغطي بكفن ..
واللون .. خلاص .. راح واندفن ..
ما فضلشي .. غير مية مطر ..
ضلت طريقها .. في الحضر ..
رايحة .. وجاية في المدن ..
وكانها حفنة بعد ..
ماثية معانا .. بالسهاد ..
وكانها .. لون المطر ..
ما لهاش ميعاد .. ما لهاش قمر ..
ما لهاش وطن

.....

العولمة


إيه اللي جرى .. بقي في الدنيا ..
وكان الناس دي .. ناس ثانية
وكان قلوبهم .. وبيوتهم
من الوسع بقت ما بنتشبعشي
الواحد زي اللي ما خدشي ..
القاعد واقف ما قعدشي

.....

والكل بيجري .. ومش طایل
.. ما هو شايف الفرع .. بيتمايل ..
والحلو أهو .. طالع نازل ..
يجي يلحق .. بس ما يلحقشي ..

.....

وانا وسط الزيتة .. ما باعرفشي
أنا باسمع .. والا ما باسمعشي



ما هو إنت كلامك .. وسلامك ..
بيخلي القلب ده .. لو صانك ..
يكبر .. وكأنه ما كبرشي ..
.. يسهر .. علشانك .. ما يشوفشي
غير جري ورمح ما لوش آخر ..
ولا حدش عايز يتأخر ..
ما هو كله .. بقي عايز كله ..
.. ما يهمش بقي أصله وفصله ..
ولا إيه راح يحصل في الآخر ..
ما هو أصل العالم متعولم
والمبدأ بقي ندى أسلم
والبائع ياخذ من الشاري ..
طب أقفل ليه عنك داري
خش اشرب قهوة واتكلم

ما هو إنت أكيد انك أعلم

وأنا أصلي عمري هاتالم

.....

ده انا ها نرف أرضي .. وجراحي ..

وها تاخذ عرضي .. ويراحي ..

وها تشرب .. دمي .. وشرابي ..

واملا لك كاسي .. بأتيني ..

وها نخدم .. كده نفضل نخدم ..

.....

ما أهو أصل السيد .. بيتكلم

.. والعالم بيه راح يتعولم ..

واحنا اللي هندي .. ونسلم

احنا اللي هندي .. ونسلم.

.....



يا زين

خلينا .. بعيد يا زين
لا تطلب .. وصالي .. الحين
دا قرب الحبيب .. لو دام ..
يتحول مع الأيام ..
ويطير .. بلا جناحين ..
خلينا .. بعيد يا زين ..
يكفيني .. أحس بقلبك ..
يرضيني .. بجنة حبك ..
وتضلل على العين ..
وراسمني على الكفين
خلينا .. بعيد يا زين
اطلبي .. على التليفون ..
طمني .. برتم حنون
واسألني عن الأحوال ..



ولا تطلب لهيب ووصال ..

دى الدنيا .. ما تدي انتين

خلينا .. بعيد يا زين

.....

دى الدنيا .. لو ادت تاخذ

وأنا أصلي بقيت متآخذ ..

ولا اقدر أكون انتين ..

ولا اسهر مع قلبين ..

خلينا .. بعيد يا زين

.....


يسعدني أكون جواك

تهواني .. وأنا أهواك

وبروحي أطير لسماك

مش هانزل معاك للطين

دي الدنيا ما تدي انتين





آه .. يا وطن

يا ميت خسارة .. ع الشباب
الخلو .. رايح .. والا غاب
في سكتك .. آه .. يا وطن
يا اللي بقيت .. زي الكفن .

.....

عمال .. بتحضن في الولاد ..
تشرب دماهم .. في الميعاد
وتقول لهم .. ضحوا .. تعالوا ..
تبخل عليهم مهما نالوا ..
وتخلي سكتهم سهاد
وتملا دنيتهم حداد
وتسد قدامهم .. أمل ..
وبطالة .. مش لاقيين عمل ..

مرة عشائك .. يا وطن .

مرات تحدها .. المحن ..

ما انت .. بقيت أكبر كفن ..

راسم خطوطك بالشجن

رامي ورودك .. للوهن .

لا اديت حبايبك من نصيبك ..

ولا خفت آهاتهم .. تصيبك ..

والخير .. بقي منداس .. وميت ..

والظلم فيك .. هو اللي ساد ..

واللي ما عندوش .. يبقي عنده ..

وأهو اللي عنده ما عندوش ..

يا حلو يا رمان .. يا سوس

ما تيجي نشرب عرقسوس


أهو ده اللي نقدر نشربه ..
من غير ما تضرب أي بوز

.....

خلينا دايما ع الرصيف
قاعدين وفاكرين إننا
عاشين .. ودايقين الهنا ..
ما كفاية شايفين الرغبة ..
وغيرنا .. جيبه .. اليوم نضيف ..
ويبص لنا .. كأننا ..
احنا القوي .. وهو الضعيف ..
واحنا بقينا فضعفنا ..
دبان .. بياكل وشنا ..
ويغني لنا كلنا ..
ويقول لنا .. آه .. يا زمن .

أحزان


أحزان .. ورا أحزان .. ورا أحزان
وقلب مهان
كان فاكراً .. إنه خلاص نسي ..
إنه فضل إنسان ..
كان فاكراً إنه .. بدمعته .. مع غنوته ..
عبر الجراح .. فات اللي راح ..
واللي بقي من كان ..
لكنه دايماً .. ينجرح ..
مكتوب عليه .. مرسومة ليه ...
من سالف الأزمان ...
هو صحيح .. داق الفرح
مع كل دق بدنيته ..
.. والنخل .. ياما فيه طرح ..
في كل خفق .. بروضته ..



لكنه كان دائما .. يضيع ..
مع إنه .. كان عاشق مطيع ..
بيدي دائما هدمته ..
واللي بقي .. من عهدته ..
واللي فضل .. واللي حصل ..
واللي استمر معاه ..
من جرح وبأ الآه ..
واصبح كأنه ما كان ..


.....

أحزان .. ورا أحزان .. ورا أحزان ..
وضاعت الشيطان ..
ضاعت مرارات الأسى
والذكريات صبحت شذى
القلب يستنشق عبيرها ..



• • • •

موجود .. تعدلها الحصى ..
وأسود .. ما تسمع غير زئيرها
أولها .. آه ..
وأخرها .. آه ..
وسلاسل الأشجان ..
وجدائل الأحزان ..
والقلب كومة من أسى ..
عائش ولكنه انتسى ..



كانه ما كان يوم هنا ..
ولا داق في يوم طعم الهنا
ولا يوم .. نسي طعم الشجن
وهو ماشي .. في المحن .
ما هي أصلها أحزان ..
ورا أحزان ..
ورا أحزان ..
وقلب مُهان ..



مش بس

مش .. بس .. بتهزمننا الأيام ..
وتمشي علينا .. أي كلام ..
دى بنكتب .. خطوة ما تعدي ..
ويتأخذ أكثر .. ما بتدي ..
وتجينا .. وتضحك حوالينا ..
وتسيينا .. ولا حتى سلام ...

.....

لو أقدر .. هادي لك عمري
أو أسهر .. وأنا باسند ضهري ...
بوجودك .. أصلك مش عارف ...
اديتنى القوة .. ومش خايفة ...
وما عدت من الدنيا شايقة ...
غير فجر .. وعصر .. وحلو منام ...

.....

لكن .. يا هل ترى أيامنا ؟

هتحقق لدينا .. أحلامنا؟

ونشوف الصبح .. نسيم وورود..؟

وطريق مفروش .. بلقا وعود ...

وخمایل ورد .. بتتمني ...

نقعد بالحب .. ونستتي ...

ونحس إنه احنا مش أيتام ...

• • • •

أَيَّامٌ بَتَعْدَى وَرَأْيَا...


وتأخذنا للأمس البارح...

والشوق كان طير في الهوى جارح ...

ودعنا زمان .. وادانا سلام ...

وارتحنا من الجرح الصابح ...

وقفلنا الدار .. من خير مشوار ...



والأ راح تمشي بالمحبوب ...
ترمي لنا من عنده سلام
نرجع ونقول آهو ده مكتوب ...
واهو عشنا يومين .. حلوين تانيين ...
بلقا ووصال .. وهوى مشبوب ...
وأصلها .. إن طالت أيام
أيام .. أيام
أيام .. أيام
بتمر قوام
بلقا .. وسلام .. وحنين منداري في الأيام
أصلها أيام ...
أصلها أيام ...

.....

مناجاة

أشوف الخير

ولون الخيل

وضوء الصبح

يتمايل على القنديل ...

أقول : الله

أشوف الزهر .. يتفتح على عوده ...

ما بين أصفر .. وبين أحمر .. ولون أبيض ..

كأنه غيم .. بيتسطر .. ويتشهد ...

بصحبة فل هيمانة مع وروده

أقول : الله ...

أشوف الموج بينكسر ويتمخطر ...

ويخبط شط بمياهه ما ينكدر

ويهدي أما يمشي بعيد ويتحسر ...

وارجع ثاني يجري عليه ويزمجر ...

كأنه حبيب .. وبيعاتب ...

كأنه غيب .. ويصاحب ...

ويغسل كل أدرانه .. وأشجانه .

وهو جاي باللولي .. ومزهر ...

أقول : الله ...

أشوف أسماك.. في وسط البحر ألوانها ...

تُحَفّ تسبح .. ما بين الموج .. بتيجانها ...

أبصر وأقول :


بديع الصنع والتكوين .. مزينها ...

وخلاها .. وحلاها .. بشطانها ...

تسرّ العين .. إذا طافت بعنوانها

وتتهدف روحنا : يا الله

يا الله ...



تخلي الكون .. نعيم مضمون

قسم بالنون ...

"وبالقلم .. وما يسطرون"

ده أصل القرب في وصالك ...

لكن عقلي بقي عاجز

وعقلي مش بيستوعب

ومش عارفين .. هنركع فين

وسطح الأرض .. بيلهلب ...

وادي القاتل ..

بقي فارد ..


بقي مارد ..

بقي بياكل ..

بقي بيصخب ...

وادي السائل ..

مع المظلوم ..



بقي شاهد ..

وشايف لحدہ يتوضب ..

ومية نيل .. مع دجلة ...

بتجري بالدما .. وجلة ..

وأهو ماشيين .. ومش عارفين

هترسي فين بنا البوصلة ...

يا رب .. الدين .. بيتحارب ...

عشان نفضل .. بلا صاحب ..

تضيع الأرض .. ويا العرض ..

نضيع بالدم .. ويا الهم

يا ربي .. كن لنا صاحب ...

سايينا لمين .. بلا صاحب؟

ونركع فين .. إذا الصاحب ..

ترك عبده بدون صاحب؟

.....



الله .. يا بلدا

الله .. يا بلدا .. عليكى ...
مليانة فوارس .. تديكى ...
أدى فارس .. وسلاحه الكلمة ...
ومهندس .. بينور عتمة ...
وطبيب إنسان .. ما يخلصنى ...
والكل بيسهر .. يداوىكى ...
الله .. يا بلدا .. عليكى ...
والطالب ده .. برعم أخضر ...
يتربى بحبك فيه يكبر ...
يطرحها ثمار .. ولآلى أفكار ...
يفرد جناحاته .. ويضلل ...
بالخير فى هواكى وحوالىكى ...
الله يا بلدا .. عليكى ...

.....

يا جنود الأرض المشتاقة ...
يا أسود جاية لك ... تحميكي ...
احموا له كتبه وأوراقه ...
علشان مايئته يراعيكي ...
وبحبك .. بيني .. ويغني ...
الله .. يا بلدنا .. عليكي ...

.....


يا فارس .. مليون .. حنية
والكلمة .. بقلمك مروية
بمداد أرواح حلوة عفية
ورافعها سلاح لسنين جاية ..
يتقول .. بالدم .. ها نفديكي ..
وحياتنا .. بنهديها ليكي ..
الله .. يا بلدنا .. عليكي ...

يا جندي .. فارع .. متوثب ...
يا ماشي .. وطالع .. ما بتحسب
مشغول بالشاغل .. ما بتتعيب ...
ولا همك .. تيجي .. أو تذهب ...
ما هو أصله عايش .. بحميكي ...
الله .. يا بلدنا .. عليكى ...

.....

يا قلب كبير .. مليون بالخير ...
ويا نجم منير .. بتتور ليل ...
ويا صوت مليون .. باللقا أشجان ...
بالحب يفوت .. بالنيل عمران
بيجمع ناسك حواليكى ...
الله .. يا بلدنا .. عليكى ...


.....



في كل مكان .. بنشوف إنسان ...
فارد جناحاته .. بكل حنان ...
مارد نبضاته .. نهر أمان
تبقى له كلمة يغنيكي ...
الله .. يا بلدنا .. عليكى ...

.....

لو كل الناس دول حبوكي
من حب الفارس وادوكي
وشافوكي نخلة بتضلل ...
ليهم .. لولادهم راح تكبر
مش ممكن يوم كان قطعوكي
أو بصوا لروحهم وسابوكي ...
أو ظلموا غيرهم وخدوكي ...
ياكلوكي لقمة ويرموكي ...



لو كانوا فعلا حبوكي ...
مش ممكن كانوا يرموكي
يا رب الكل يحبوكي
ويعيشوا بضللك يحموكي
ويقولوا : رب يخليكي ...
وتخلي الفارس يديكي ...
وحنفضل كلنا نديكي ...
نمشي وياه وهنديكي ...
والكلمة معاه راح تحميكي ...
نديكي .. ويفضل يديكي
ونقول : يا رب يخليكي ...
الله .. يا بلدنا .. عليكى ...
.....




كان قلبي

كان قلبي عايش متهني
نايم جواي .. ومتحني
وباشوف الناس .. دول هم الناس
من غير ما يطير بيّ الإحساس
من غير ما أعرف حتى أغني ...


.....


أصل أنا كان قلبي وياي ...
يمشيها خطوة برضاي ..
يرجعها برضه مستتي ...
لو حتى كان خايف يعني ...
يحسبها بالعقل معاي ...
كان قلبي
آه منه قلبي

مش راضي يعرف عنواني
ولا عقل معاه كده راح يجدي
ولا حنى رضاه بقي من يدي
طاير في النور الرباني
حابر بيزوّد أشجاني
وكأنه مش راجع تاني
دقاته دى مش من عندي
وكأنه مش هو قلبي
وكأنه متغرّب جنبي
كان قلبي
آه منه قلبي
الحب ده غيب وقدر مكتوب
والشوق ده حنين لحبيب مرغوب
لا يبنفع فيه صد ولا هروب



لما نلاقه نشوف المحبوب
يصالحنا بيه .. ويا خدنا ندوب ...
وأدور كده .. ما لا قيش قلبي
وأشوفه عندك متخبي ..
كان قلبي
آه منه قلبي ...
أنا وسط الزحمة ما باشوفشي
آجي أسمع صوتي ما با سمعشي ...
طب أقول لك .. والا ما أقول لكشي ...
رجّع لي قلبي من تاني ..
.. خد منه حبي وحناني ...
.. وابعتني تاني لمكاني ...
.....
باحتاح لك تيجي نداويني






من قلبي
ويضيع عنواني
من قلبي
كان قلبي
آه
منه قلبي

.....



وطني

وردة .. ماسة .. نبضة .. فآزة
إحنا جنود تفتيش وحراسة
واحنا عينيك مش واخدة أآازة
وكل الدنيا جوه .. ف قلبي
وقلبي حورية .. بيبك متخبي
وشجرة سنطة بيبك متعآزة ..
وأنا .. من نيلك .. باروي غيطاني ..
وفارس خيلك .. مالي زمني ..
وأنا في سماك .. بافضل دفيانة
وبهنا لقياك .. بابقى رمانة
لو تفتحها .. تشوفها ملانة
بألف زمرد .. مع ميت ماسة ..
وكل ما أمشي .. بالآقي الخطوة ..
تقول ما عليهي .. وراكي العزوة ..





وانت جواهر .. مالهش عد
وبيك باتفاخر .. لوجه حد
وانت اللولي .. اللي بينور ..
بيه محصولي .. ومعك يكبر ..
وازرع بيك .. أحلي الأشجار ..
والقي فيك .. أغلي الأحجار ..
ما انت الحب .. بيملا الدار ..
ويملا الغيط .. ياسمين وخضار
ناكل منه .. وما بيخلصني
نعطش .. نشرب .. ما بنشبعني
نفضل كده .. ونقول ده رضا ..
ديمها يارب .. علينا عمار ..
ده انت و اخدنا ف حضنك ياللي ..
حدودنا بحبك واحنا نخلي ..


كل بيوتنا ملانة ثمار ..
ده انت الروح اللي بنديها ..
معاك بتبوح باللي بيشجيه ..
وانت القلب يدق معاك ..
ياخد حب ويدي هواك ..
وانت أولادي جوه ف عيني ..
وانت ميلادي سطور بجيني ...
وانت العمر اللي انا هامشيه ..
وانت البحر اللي ها اعديه
ده انت حدودي .. وانت بدايتي
وانت جدودي .. وانت حقيقتي
وأخر سطر معاك .. ده نهايتي ..
يا وطني .. يا أرضي .. يا فرحي .. يا سعدي ..
.....

طاقة الحب

طاقة الحب جواي
إذا راحت أعيش إزاي
دي صحبة قلب .. وياي
بعطر الفل لو فاحت تكون الناي
أغني لها مواويلي وأشعاري ويوم كده جاي
وهي بحوري مليانة ماسات وغابات
وهي طيور شبعانة وبتحلق ما بين سماوات
وهي أرضي بامشي لها وأتدفي وأتعاقي
وهي بلدي أحنّ لها وأتداوي وأتشافى
دي طاقة حب تديني تخليني أدور حواليك
واشوفك شمس صحتي وهنتي وبتنور طريقي بيك
وعايزك تبقى ف قلبي تملي نور
ورايدك الوطن اللي معاه بأدور








يا وردة حب في أرضي
.. وفي قلبي
أعيش كده بيبك،
تملي نور
وبامشي بيه على دربي
وأفضل أقول دي طاقة الحب
أنا بيبها ..
با غنيها ..
واعيش ليها ..
مع قلبي.

.....

ده حظي

ليه حظي من الأحباب، يا دنيا ما فيشر، كده
أصحاب، باعيش وحداني بين أغراب، ما حدش فيكي
يديني، ولا حدش يهنييني، وكل ما الاقي شط أمان
وأجري عليه وأنا فرحان، وعازب بيه أكون دفيان، الاقي
الشط ده أو هام يحاكي الصد، ويقولوا على كلام،
ويرموني بحد سهام تقطع فيّ جواي، وتترني كده
حكاية، ما أعرف منها أولها، ولا أعرف حتى أغني لها،
والاقي نفسي بابكي لها، وأبكي كمان على نفسي، من
الأشجان، ومن بؤسي، وأدور ع الحبيب ما الاقيش، ولا
حتى الأقييني، وأتمنى الطبيب ما نسيش من الوحدة
يداويني، وأجري عليك واحن إليك وأبكي معاك على


حظي، واشتوف وياك كده نفسي، واخش معاك لجواي،
واقول يا ريت ما تتساني، وأرجع تاني وحداني، وأفضل
بيك أعيش لهواك تعيش روحي وتدفى فيك ولا نقول تاني
ده حظي ولا أبكي على نفسي.



ما لي الدار

والله ومليت الدار
مهما الخراب عشش
ده انت يا بلدي الدار
وإن جه غراب يطفش
فرسان قلوبكم دهب
ومداد ورقكم حطب
تدفي الليالي بيه
تصفي يا غالي ليه
ده انت أسد وجسور
عاش بقلب نسور
طاير بأفكارك
ثاير بأشجارك
تزرعها حب وغيظ
وأمان ببحر غويظ

بيلم فينا .. لم..
 يملا عينينا .. هم
 نشربها كاس من دم
 بنهد منا الحيل
 ولا عدنا نلقي الخيل
 ولا فارس الأساطير
 فينك يا بوي .. ويا عم
 شافين خطانا .. تلف
 نجري بكل ملف
 ولا عدنا بنهدي
 والخطوة ما تعدي
 غير القعاد على الرف
 يا فارس الكلمة
 هات لي معاك هدمة




اتغطى بيها فيك
وامشي مع خطاويك
مطرح ما تمشي أكون
وأكون مع سيفك
نكتنها بيت موزون
وأعيش مع طيفك
يملا البلد أشجار
يملاها حنية
والكلمة مروية
مليانة خير وعمار

.....



القلب اللي

القلب اللي كان كسير، لملم جراحه ف براحه وقفل بحزنه
على محاسنه وانتوى يرجع يطير، بعيد عن سكة
الأحزان، وحيد متدفي بالأشجان، يمكن يعيش بآلام ما
فيش، يمكن يداوي بالغياب غدر الصحاب، يمكن كده
يرجع له غصنه، وهو ماشي ف سكتة مع دمعه مع
غنوته بعد الإياب، ومشى وشالك جوه نبضه، ما إنت
عهده، ودنيته ونعيم هواه، لا عرف بحيد عن سكتة أو
حتى يقلع هدمته ما انت معاه مطرح ما بمشي أنت ماشي
لا بتقف ولا بتخف ولا سايبه برضه يعيش جفاه، لو خاف
بتأخذه تؤسسه، ترفع جبينه تحرسه وتعيش لقاه، ولا عاد
بيقدر بيتعد ولا يرتعد، ولا ينكسر مهما حصل وانت
ضياه، خليك معاه ولا تكسروش، ما تزعلوش، واوعاك





في يوم تقسى عليه، لا تقول له كلمة تجرحه، يفضل كسير ما يعود معاك يقدر يطير ولا حتى يقدر ينكسر من ثاني أو بفضل كبير، في اللحظة دي مثن هتلاقيه، هيموت ما تقدر تلحقه مهما تحاول تجري ليه.




مهدودة .. أنا

مهدودة أنا .. من جوه ..
وجواي قفل حديد
وسلاسل من خشب وجريد
ماليني .. بعمق الفجوة ..
اللي جاياني لورا .. وخطوة
ماشية وياي .. بتقل شديد
رابض فوق نبضي .. وفوق أرضي..
وها زمني .. وجاياني هنا ..
ورامياني كده ف بلدي .. بقلب وحيد .. ونبض شريد
كإني رايحة للأيام .. بتعصرني ..
وبتقوّني من أوهام .. بتصهرني ..
لا الاقي خطوتي لقدام .. وكإني ..
باخاف منك .. باخاف مني .. ومن ظني..







والأقبي نفسي في هرة ..
وأنا مهدودة من جوه ..
أنا مهدودة من جوه ..



انت منور

في وسط كل الناس انت اللي بتتور
بتقول : أنا موجود بالحب متسور
لو ناموا، أو قعدوا إنت اللي بتيجي لهم
لو حبوا يتسندوا إنت اللي شايهم
ماشيين بيختلفوا
حايرين بيستلفوا
ما لا قيش منهم حد
لو كنت عايزاهم
وان يوم بجد الجد
ما لا قيش غير الصّد
يجروا ما يتلفوا
ولا اشوف منازلهم
لكن دا كله ليك

باتداوي منهم بيبك

بتلمهم حواليك

وانت اللي بتنور

ويطوفوا بيبك وإليك

وانت ما تتغير

ما هو إنت الحب

بجلال معاني الصب

ونعيم هواه القلب

وهواك ما يعرف طب

والقلب ما يلاقي


في رحلة الأيام

غير نورك الباقي

مهما يكون الضلام

أصل انت كل الوجود

موجود



ولا فيه لحسنك زي
وبديع محاسنك ضي
يملا قلوبنا عمار
يطرحها نور وثمار
وورود على الأشجار
وتشوف زماننا جيّ
لما نشوف الضي
وقلوبنا بتتورّ
ده الحب منك حيّ
والقلب بيك له ريّ
يا اللي ما لكش زي
وانت اللي بتتورّ
إنت اللي بتتورّ

• • • • •

صدر من مطبوعات الفجر

١	تغريبة عزراق الهلالي	د. يسمي العزب
٢	الهاموش	حسن نور
٣	المبعدون	إبريس علي
٤	حكايات، صرية	د. نجدي إبراهيم
٥	الدائرة	د. نجدي إبراهيم
٦	شجرة مريم	د. يسمي العزب
٧	تأملات في الفن والثقافة	د. محمد حسن عبد الله
٨	أمسيات عائلية هادئة	منتصر ثابت
٩	شجر الليمون	خالد النشوقاتي
١٠	عصفور الحب	نجاة خليل
١١	حتى لا يطول الانتظار	محمد نور الدين
١٢	اكتب عمري	ليلي محمد علي
١٣	زائر بعد منتصف الليل	مديحة أبو زيد
١٤	خاطنة في الجنة ..	يحي سليمان
١٥	النملة والحداية	عزت زايد
١٦	واحد اثنين	عزت زايد
١٧	المراهن	سيد أمين
١٨	فيكي ايه يتحب؟!	جلال الصياد
١٩	فرس جامح	ليلي محمد علي
٢٠	حريم الملح والسكر	محمد الغنياتي
٢١	قصر المغارب	د. يسمي العزب
٢٢	الدنيا جاية	د. فاطمة الحفني
٢٣	أه . يا وطن	م. مني عوض